

Saunia e Jessica Larsen
(E faavae i se tala moni)

O lenei tala sa tupu i le ISA.

Na amata i faatafafa e fa. O le faatafafa e fa o se taaloga sa taalo ai nisi tamaiti i fafo o le aoga i le taimi o le malologa. E toafa tagata taaalo sa tutu i se sikuea ma faafiti se polo i le tasi ma le isi. A misi le polo ia i latou, e tatau ona latou o ese mai le taaloga.

Sa ou popole i le taimi muamua na ou taalo ai. Ae sa ou lelei i le faiga. Sa manaia tele!

Ona misi lea e le teineitiiti mai le isi o’u itu le polo. Sa ia ta’ua le suafa o le Tama Faalelagi ma ata. “Malo Gwen,” o lana tala lea. “Ou te matea ua ou pe!”

Sa ou uuina mau le polo. Faatoa uma lava ona ia ta’u fua le suafa o le Alii! E tutusa lava ma le palauvale.

Ae sa leai se isi na foliga mai na manatu e leaga. Sa latou talie uma, e pei e malie pe manaia.

Sa matou faaauau pea ona taalo. Ona toe tupu foi lea. Sa misi e se tasi le polo ma ta’u le suafa o le Tama Faalelagi e pei o se upu palauvale.

I ni nai minute mulimuli ane, sa misi foi ia te au le polo. Ma e pei lava o isi, sa ou ta’u fua le suafa o le Alii. Sa talie tamaiti ma faapa matou lima a o ou toe foi i le laina e faatali e toe taalo ai.

Ina ua uma lena, sa ou taalo i le faatafafa e fa i aso uma . . . ma sa ou ta’ua pea lava pea le suafa o le Alii.

I se tasi aso na auai ai la’u uo o Abby i le taaloga. Sa ia pasi mai le polo ia te a’u. Sa ou misia ma ta’u le suafa o le Tama Faalelagi.

Na emo mata o Angie i le te’i. “E le masani ona e talanoa faapena.”

Na sa’o lava o ia. I le fale ma i le Peraimeri, sa ou aaoaina ai o le suafa o le Alii sa faapitoa ma e le tatau ona tatou faaaogaina e palauvale ai pe tausua ai. Ma o le mea lena sa ou faia—mo ni vaiaso! Sa ou lagona le ma’i.

Ina ua tuua le aoga, sa ou maua Tina i lona ofisa. “Talofa, la’u pele” sa ia fai mai ai.

Sa amata ona ou tagi. Sa ou faamatala atu ia te ia e uiga i le faatafafa e fa ma le ta’u fua o le suafa o le Alii. “Ou te le iloa pe mafai ona ou taofia,” sa ou fai atu ai ma le masusu.

Na ia fusimauina au. “Atonu e te lagona faapena i le taimi nei. Ae ou te iloa e mafai ona fesoasoani mai le Tama Faalelagi ia te oe.”

“E faapefea?” Sa ou fesili atu ai.

“O le salamo o lona uiga o le toe liliu atu i le Tama Faalelagi ma taumafai malosi e fai ia lelei atili,” o le tala lea a Tina. “O le a le faigofie, ae e mafai ona e tatalo mo se fesoasoani. A o e faaaogaina upu e lelei atu, o le a mou atu lau mausa tuai.”

Sa fesoasoani Tina ia te au e fai se lisi o upu fou e mafai ona ou fai atu ai nai lo le suafa o le Alii.

Ona ma tatalo faatasi lea. Sa ou ta’u atu i le Tama Faalelagi lo’u salamo ma ole atu mo se fesoasoani e faaoga ai gagana lelei.

O le aso na sosoo ai sa ou manava tele i totonu ae ou te lei taalo i le faatafafa e fa. Ina ua ou misia le polo, sa toeitiiti lava a ou toe fai atu le suafa o le Tama Faalelagi, ae sa ou taofi. Nai lo lena, sa ou fai atu se upu mai la’u lisi.

“Oi, fa’i pula!”. Na ou fai atu ai. Na manaia lena lagona!

O aso taitasi sa ou taumafai malosi ai e faaoga se gagana e lelei atu. Sa ou sasi pea i nisi taimi. Ae sa ou tatalo ma taumafai pea. E lei umi ae ou taalo i le taaloga atoa e aunoa ma le ta’ua o le suafa o le Alii. Ona atoa lea o le vaiaso. Ona atoa lea o se masina!

Sa ou iloa na fesoasoani mai le Tama Faalelagi ma Iesu Keriso ia te au e salamo ma suia lau mausa—ma sa lelei atu lena lagona nai lo le manumalo i soo se taaloga! ●

O LE A LE UIGA O LE TA’U FUA O LE SUAFA O LE ALII?

O se tasi o Poloaiga e Sefulu o le, “Aua e te ta’u fua le suafa o Ieova lou Atua” (Esoto 20:7). O lona uiga e tatau ona tatou talanoa e le aunoa e uiga i le Tama Faalelagi ma Iesu Keriso ma le migao ma le alofa. E le tatau ona tatou tausua e uiga ia i Laua pe faaoga o Laua suafa ma le le faaloalo. O lenei poloaiga o lona uiga foi e tatau ona tatou avea ma sui lelei o le Faaola. Pe a tatou ta’ua i tatou lava o soo o Iesu Keriso, e tatau ona tatou faia le mea o le a Ia faia.*

* Tagai Dale G. Renlund, “Mauaina o le Mana o le Atua e ala i Feagaiga,” *Liahona*, Me 2023, 36.

ATA NATUSIA E KIERSTEN EAGAN

I le Peraimeri, sa ou aaoaina ai o le suafa o le Alii e taua tele.

O se Mausa Lelei Atu